

四庫全書

史部

欽定四庫全書

史部

欽定大清會典則例卷九

詳校官檢討 臣 劉 炳

編修 臣 程嘉謨覆勘

總校官原任中允 臣 王 燕 緒

校對官助教 臣 汪 錫 魁

謄錄監生 臣 徐 廷 瑛

欽定四庫全書

欽定大清會典則例卷九

吏部

文選清吏司

旗員升補

一官員加級乾隆五年奏準凡文武改補班聯相等者任內所有加級如原繫隨帶之級仍準帶於各任如繫尋常加級亦照對品補授之例

準其隨帶如世爵改補文職品級稍優文職承襲世爵班聯越等者均照升任官之例每級改為紀錄一次其有世爵品大文職品小例應開闕之員或奉

特旨仍著兼理部務或經該堂官保留其文職任內所有加級仍照例每級改為紀錄一次注冊如由公侯伯奉

旨補授卿貳大員若遇再升任者其在世爵任內所

得加級紀錄仍準隨帶在文職任內所得加級
亦照升任官每級改為紀錄一次○又奏準筆
帖式天文生其任內先有加級續經改換品級
者仍準隨帶俟升任後凡品級考載繫應
升者均為升任每級
改為紀錄一次

一武職世爵各官兼理部院順治年間定由郎
中員外郎官補授叅領佐領者均兼部院行走
其由員外郎等官補授叅領由主事等官補授

佐領者均解部院職任○康熙四十五年題準
凡由叅領男爵輕車都尉補授郎中等官由副
叅領侍衛騎都尉佐領補授員外郎等官雲騎
尉補授主事護軍校驍騎校補授小京官均俟
三年限滿遇有升轉將武職食俸年分以上朝
之日起通行較算如原繫部院主事筆帖式授
為侍衛佐領復用員外郎等官者升轉時將前
在部院之俸及見任之俸準其接算其在武職

上行走之俸不必通理○雍正八年議準由郎中等官承襲輕車都尉由員外郎等官承襲騎都尉由主事等官承襲雲騎尉者均屬班聯相等應令兼理部院其世爵品大文職品小除奉特旨兼理部務者不行開闕外餘均令世爵上行走所遺員闕即行銓補如果有才能出衆因世爵品大不行兼理者準該堂官具奏保留引

見恭候

欽定其循分供職者照例開闕不得奏請無理倘有請托徇情等弊引

見時其人不勝保留或保留之後辦事不能妥協即將保奏之堂官嚴加議處○乾隆十三年奏準八旗世爵及武職官員改補文職者輕車都尉叅領以科道郎中用騎都尉副叅領佐領以員外郎用雲騎尉以主事用護軍校驍騎校等以七品小京官用其世爵均仍帶於本身侍衛有

奉

特旨以文職用者一等待衛繫三品應以三品京堂
用二等侍衛繫四品應以四品京堂用遇有員
闕三品者開列於應升人員之前四品者開列
於俸深人員之前請

旨補授此內各員闕如有應用科甲以及考試擬正
陪者仍照例不行開列至三等四等侍衛繫五
品應將三等侍衛以郎中用四等侍衛以員外

郎用藍翎侍衛繫六品應以主事用遇有員闕
歸於月分照例補用

一宗人府題補各官雍正二年議準宗室理事
官由鎮國將軍輔國將軍副理官由奉恩將軍
佐領經歷主事由廕生五六品官並考取一等
閒散宗室均由宗人府擬定正陪引

見補授○乾隆二年奏準宗室理事官遇有郎中應
升員闕與旗員郎中一例較俸開列升轉

一宗人府宗室官員出差乾隆三年議準宗人府理事官凡遇出差亦令該部行文宗人府將才能俸深者保舉一人咨送該部與各部院保送之旗員一同引

見候

旨簡用

一內務府堂郎中等官升轉乾隆五年奏準內務府官員向由內務府升轉其堂郎中總理六

庫事務郎中等三闕經內務府奏準咨送過部以應升之官列名應準其與部院官一例較俸升轉此內有由漢軍郎中遴選調補者應令其以補授堂郎中等闕之日扣算食俸三年之後再行接算前任郎中之俸與漢郎中一例較俸升轉若暫時差往外省本任不行開闕者仍照見任官例論俸升轉其出差例有年限如鹽政關差等項本任員闕內務府別補有人亦應準

其論俸仍竢扣滿年限再行擬升未經差滿之時如應升道府準其以升銜注册竢差滿回京照依原升補用其未經差滿之前如尚未升用竢回京之時未經補用以前仍不準算俸得官之後或仍補堂郎中等闕或補授對品官方準一例較俸推升

一漢軍典籍升轉乾隆三年議準以推升中書後準其與漢中書較俸以主事同知兼掣與各

項應升人員一例推升

一漢軍年滿大使升轉乾隆四年奏準戶部三庫及戶部寶泉局工部寶源局大使均由筆帖式補授五年期滿仍照原筆帖式品級以應升之官用其由漢軍筆帖式補授大使年滿者歸於數月如遇應升京官班次與漢軍俸深人員分闕間用如遇應升外官班次歸於即升月分與在外各項即升人員通較日期先後補用其

未入流筆帖式改為九品者升轉之處仍照品級考所載以州同州判縣丞升轉

一京官降調候補順治年間定京堂降官三品

以上者悉照品級補用降至正四品者不補大

四品

如通政使司副使大理寺少卿

以小四品用

如太常寺少卿太僕寺少

卿內閣侍讀學士

降至從四品者不補祭酒借補正五

品京堂仍支從四品俸○乾隆四年奏準從四

品內祭酒升轉甚優凡降至從四品者既不準

其以祭酒降補自不便照祭酒升轉請以從四品銜管五品京堂事遇有開列引

見升轉均列於各項應升人員之前專以應升之四品京堂員闕升轉○又奏準京堂降至正五品從五品者不補郎中員外郎以京堂用四品以上京堂降至六品以下者並無堂官可補應停其補用五品京堂降至從五品者亦不補員外郎以堂官用

京堂降至從五品者有鴻臚寺少卿可補故仍不補員外郎如

降至六品以下悉照所降之級與各項降官一

例補用

五品京堂降至六品以下均屬司官若一槩不準降補則降一二級即屬無官

可補故仍準與降官一例補用其餘各項降官均照所降之級

序補惟降從五品者不補鴻臚寺少卿降從九

品者不補司務均各照對品別官補用降從六

品者不補光祿寺署正以正七品用仍支六品

俸與六品一例較俸升轉降至正九品者以九

品筆帖式用

滿官並無正九品故準補筆帖式

升正從八品之

闕蒙古官員降至七品以上者準以原銜借補
中書降至八品以下者以原銜借補理藩院司
務如有情願補筆帖式者準其具呈補用漢軍
降至從八品者不補典籍因繫中書升補之官並無應補班次以
筆帖式用帶餘級食俸仍升八品官

一外任旗員降補京官乾隆十四年奏準各省
理事同知通判遇有降調者悉照京官降調至
滿洲蒙古知縣事同一例應均以京官降調嗣

後凡降一級者即以七品筆帖式改補降至八品者即以八品筆帖式改補降至九品者即以九品筆帖式改補○十五年奏準外任道府以下滿洲蒙古人員如由正印降調赴補者準其各按品級遇正印佐貳員闕均準降補如由佐貳官降調赴補者不準降補正印均以對品別官補用惟降至從六品以下除正七品之知縣一項由正印官降調者尚堪補用外其餘均繫

首領並無補用旗員之例考定例內理事同知
通判降調者原以京官補用但京官品大外官
品小若降至外任無可補之闕槩以京官對品
借補未免過優嗣後凡降至從六品以下者皆
降一等以京官補用如降至從六品者以正七
品之小京官借補降至正七品者以從七品之
小京官借補降至從七品者以正八品補用但
滿洲蒙古無正八品之小京官應均以從八品

之小京官降補降至從八品以及正九品者均以九品筆帖式補用不準仍帶原銜以上降調借補小京官人員有情願告降補用筆帖式者仍按品級準其以七八品筆帖式降補

一開列出差監督乾隆七年議準凡戶部開列大小各差監督於每年十月內行文過部咨取八旗應出大差官員按旗通行輪俸每旗覈送五人應出小差官員較一任俸每旗亦覈送五

人將職名開單序明俸次移送戶部開列

一卓異理事同知通判等官升轉雍正十三年
議奏歸化城等處同知通判及協理各官停其
三年更代其原闕即別行銓補若遇才守出衆
者題請升擢不及者黜革供職惟謹者仍照原
銜較俸推升奉

旨依議此同知筆帖式等不得題補道府知州等官如
有出衆者該督撫保題後以京官越等升用平常者

著較底俸升轉○乾隆五年奏準各省滿洲理事同知通判如有卓異之官經該督撫具題到部竝

來京引

見奉

旨注冊後歸於每年二四六十月分除各項不積算人員及應選班次仍照例辦理外如遇應升月分不論食俸深淺以應升之官先盡升用仍以升班積算倘有俸次已深者仍準論俸推升其

卓異應升之處銷去

一官員赴任給照乾隆三年議準選授

盛京等處官員以奉

旨之日為始由部咨行兵部給與路引由部給與執

照限一月到任倘中途或有阻滯令地方官驗

照詳察情節揭報該部俟該員到任之後將執

照呈繳該堂官咨部察銷如有無故違限者察

明咨部題叅照例議處除公事差遣外有告假

來京者各該堂官奏明奉

旨給假者準其來京

漢員升補

一各部司官升補乾隆元年議準郎中員闕於
六部員外郎內通行論俸不拘年限先盡俸深
者互相升補員外郎員闕於各本部主事及應
升各官通行較俸升補主事員闕於應升應選
人員輪班升選其應升班次內將漢小京官與

在外知縣各升一次

以上推升班次詳載雙月大選例

○又議

準郎中應升道府如有曾任道府因不宜外任

改補部屬者俟該堂官保題之後方準一體論

俸推升○七年議準各部院官補授時其有奉

旨試用及試看者經該堂官保題稱職再行論俸升

轉

一漢軍司官歸并漢闕雍正五年議準按各部

漢軍郎中員外郎主事及

盛京漢軍員外郎主事共三十員內除六部理藩
院較對清漢本章之堂主事九人仍補用漢軍
以各部漢闕升轉外其餘二十一員均裁去於
額設漢闕內除戶部禮部無庸增設外本部文
選司增設員外郎一員考功司增設主事一員
兵部職方司增設郎中一員武選司增設員外
郎一員刑部江南司湖廣司陝西司增設郎中
各一員浙江司山東司增設員外郎各一員工

部營膳司都水司增設郎中各一員屯田司虞
衡司增設員外郎各一員以上增設十三員並
額設各闕令漢軍漢人一例補授候選者均照
投文並捐納日期以應得部分挨次銓補又向
例漢軍升轉通算前俸漢人升轉只較本任之
俸今漢軍既以漢闕銓補如遇升轉應除去前
俸與漢人一例較本任之俸

升轉班次詳
載月選例

一京官算俸康熙二十六年議準小京官與外

官較俸升補者連閏二年滿後算作三年遇應
升員闕升用未經年滿者不準升轉所餘一日
算作日半內閣中書試俸一年仍接算扣限二
年滿後算作三年遇應升員闕升用未經年滿
者不準升轉餘一日算作日半至凡京官升轉
雖有罰俸不行停升將所罰之俸帶於新任

一外官算俸原定雲南開化廣西二府正雜等
官廣西分防五槽通判新平縣知縣祿勸州知

州麗江府知府經歷鶴慶府維西通判劍川州
中甸州判黑白二井提舉彌沙阿陋二井大使
鶴慶順寧永昌永北四知府劍川州騰越州雲
州陝西赤金靖逆柳溝安西衛均算邊俸其餘
各省均算腹俸在外有司官員以下雜職以上
除不論俸滿即升卓異等項官員遇闕即行升
補外司道閱俸二年知府以下閱俸三年方準
升轉其邊方司道閱俸年半為二年知府以下

閱俸二年半為三年餘一日均作二日算若邊
俸腹俸相當則先將邊俸升轉○康熙十年題
準邊俸官員有裁汰降級還級等官補授腹俸
員闕者或原繫邊俸後改為腹俸者原閱邊俸
若滿仍計邊俸例升若閱俸未滿以十日作十
二日其前後兩任均屬邊地者應準合算如前
任邊俸中間任腹俸後任邊俸兩任邊俸已隔
者不準合算仍將十日作十二日算凡官員有

同日到任者察照原任俸次題疏名次先後升補

一升轉論俸扣算日期乾隆四年奏準內外官員均按到任日期較俸升轉如有離任事故者計日扣除外任官員於升任內論俸降補官員於降任內論俸均將前俸截扣調任官員準其通理前俸其舊任卸事以後新任未到之前或本身交代未清或因患病稽留時日及往返程

塗候闕日期悉行扣除不準計算如有因承辦公事未竣一時不能赴任經該管官題咨到部所有留辦以後事竣以前日期仍準一例論俸一京員出差軍前升轉雍正十年奏準在京見任各官俸滿應升者除出差內地之員仍照例俸回京時引

見補授外其往軍前効力辦事滿漢各官如論俸應升得闕後即行具題請

旨補授準照升任食俸升轉所遺之闕歸月分銓選

竢回京時補行引

見

一府佐州縣閱俸十年引

見乾隆十八年

諭前令各省督撫保舉堪勝知府人員送部引見其

劣者駁回優者已不次擢用至勅部記名者不過

備數充用各省府佐州縣千有餘員其中惴惴無

華者不見知於上司或有十年不調之嘆而庸才
幸膺簡闕無他劣蹟者督撫亦未免苟且姑容殊
非澄叙官方之道其各省同知通判及知州知縣
內有本任閱俸十年以上者該部察明行文該督
撫出具考語陸續送部引見著為例欽此遵

旨議準凡調任服滿裁汰迴避等官雖非一任但一
官已閱十年自應前後接算行令該督撫出具
考語陸續送部引

見其議降議草奉

旨留任及降革之後別補原官者皆繫棄瑕錄用之人應於留任補任之後計算年月扣足十年再行調取各員任內有降革留任之案於疏內聲

明引

見其調取之員或題升推升及降革等事例應引

見者或本員適有因公來京應引

見者該督撫照例給咨引

見將十年調取之處一並聲明其調取之後因事故

離任者俟將來赴補到部之日引

見至將來陸續期滿應行引

見各官若逐員調取未免紛繁請嗣後定以三年之

期調取一次庶辦理不致參差而遵行較為簡

易

一官員即升加級紀錄順治年間定凡官員因

勞績加級紀錄不論俸滿即升各官除已經病

故草職者不叙外見任官員準於見任注册降
調終養丁憂候補者準於補授新任注册休致
者準於原任注册如有解任議處等官蒞事結
之日別行議叙其已經升任各官應叙加級紀
錄亦準與升任注册如前任之功應準即升者
於升任內準紀錄四次此指已經升任而言如前經議叙
即升尚未升任後復有前任之功應準即升者
亦於升任內改為紀錄四次此指已經議叙即升尚未升用又應

議叙即升者而言

○又定內外官員前任得有紀錄無

論調任升任均準隨帶至所得加級除對品調

補

如調繁調簡或

特轉補

如右轉左侍講轉侍讀郎中補

科道之類

並非升任者仍準隨帶新任注冊如已經

升任

無論品級大小凡品級考內載應升者皆為升任

均不準隨帶改

為紀錄一次○雍正三年題準凡內外大小各

官有降級留任者後奉

恩旨加級及議叙加級準抵銷前降之級○六年奉

旨在京官員如有情願將議叙加一級改為紀錄四次抵銷罰俸者準其抵銷特恩賞加之級不準改抵○

乾隆四年奏準升任之官前任所得恭遇

恩詔及京察加級均不準隨帶改為紀錄一次議叙加級題明隨帶者準其隨帶未經題明隨帶者不準隨帶改為紀錄一次惟軍功議叙加級不論曾否題明隨帶悉準帶於新任至議叙加級改為紀錄之後又經升任抵銷餘剩紀錄若繫

隨帶之級所改者仍準隨帶若非隨帶之級所改在任時抵銷過一次二次三次者升任槩行注銷若在任時所改紀錄並未抵銷只準將紀錄一次帶於新任至

特恩賞加之級及捐納加級不準改為紀錄四次抵銷罰俸至官員處分降級案件應將加級抵銷其有一人而加數級者無論是否隨帶均照加級年月先後次第挨順抵銷○又奏準卿貳大

員議叙加級食俸後經升任如品級相同本無俸可加者仍食本身之俸如三品升至二品及二品升至一品均將食俸一級改為尋常加一級其三品升至二品已將食俸加級改為尋常加級若又經升任改為紀錄一次○八年

諭向來在京八旗武職及外省駐防官員遇有罰俸案件準其將議叙加級改為紀錄抵銷惟在外文武各官不在此例朕思大小臣工雖分職有內外

之殊而以功抵過均屬一體嗣後外省地方文武
各員有情願將議叙加級改為紀錄抵銷罰俸者
著照在京文武官員之例準其抵銷欽此○十六
年奏準內外滿漢各官革職後復經起用原屬
棄瑕錄用所有原仕級紀自不應帶於新任其
降職人員奉

特旨起用原官或起用之官優於所降之級者所有
加級紀錄亦不應準其隨帶若既照部議降補

無庸將前任級紀復行注銷至官員緣事議革
奉

旨降補他職者其罪原應革職而降補出自

特恩與平常因公降調者不同其原任級紀亦應槩
行注銷不準帶於新任○十八年議準部議革

職降調奉

旨從寬留任人員雖經部議究未離任與議革人員
特旨降補他職者有閒其任內級紀未便槩行注銷

請嗣後內外各官有部議革職降調人員奉

旨從寬留任者其加級紀錄準其隨帶即升卓異亦準其隨帶

一官員通理前俸康熙三十九年奉

旨凡復職官員必果屬寬抑準復者通理前俸其餘一

概不準接算前俸○乾隆五年奏準內外官員除丁

憂裁汰告假補授後前任所食之俸並即升加

級紀錄均準通理隨帶外若緣事議處應降應

革遇有

恩詔免議及督撫糾叅革職提問或公事呈誤降革
後經本案審虛開復或欽奉

特旨以該員叅處之案本屬冤抑復還原職者均準
通理前俸即升加級薦紀等亦準隨帶其餘並
非本案開復以及業經緣事降革奉

旨起用人員原繫曾經獲罪棄瑕錄用與本繫冤抑
開復者不同一槩不準通理前俸即升加級薦

紀均不準帶又品大之官已經降級調補後經復還原職補用先降補任內所得即升加級亦不準帶○七年覆準向例革職留任降級留任官員開復後其革職降級日期仍接算俸次但思革職留任官員既例不食俸其革職留任日期自應不準算俸至降級留任官員仍照降級食俸其開復後降級日期均準一并較算

一官員停升順治十三年議準在京官員任內

惟罰俸之案不行停升其別項叅處事故均竝
開復後再行升用在外官員任內凡有未完叅
處罰俸事故槩行停升○十五年議準各官叅
罰皆據考功司移付文選司注冊後經考功司
開復移付文選司若文內年月款項與原付注
冊前件不符即取考功司原槁較對○十六年
議準官員被叅被訐及因公罣誤議處等事考
功司議覆未結雙月擬升之時文選司於十五

日以前將應升各官見在有無議處開單付察
考功司考功司於二十日察付如考功司移付
注有見在議處字樣者即停升轉○康熙三年
議準內外大小官員除移送停其升轉者停升
外其提問官員不候事結即停升轉○又議準
每月二十日截限截俸後雖有咨送開復者亦
不準升○乾隆七年議準月選官員均於二十
日截限若官員議處之案在二十日以後續到

者不行補付亦不停升轉其外官罰俸之案各省所完解銀均令每年按定四季呈報戶部亦按季察覈於督撫咨到之日起扣限二十日轉咨到部逐案察銷即準其照常升轉停其扣滿罰俸年限至二十日截俸後知照銀完解者亦不準升

一推升離任雍正十三年議準直省推升之道府運同同知州知縣等官不論何項出身均

調來引

見其推升之員由部代掣得闕之後具題開闕行文
各該督撫將該員任內經手事務交代清楚出
具考語給咨赴部引

見補授後給憑令赴新任其知縣以下推升官員均
毋庸引

見由部具題開闕將文憑給發該撫察明任內交代
清楚催赴新任○又奏準應引

見之升任官員其有因薦舉卓異引

見後續經推升者由部察明該員引

見未滿三年停其調來引

見將文憑封發該撫令赴新任如已滿三年者仍令

赴部引

見

一官員即升推升月分順治年間定每年二月

四月六月十月此四月先將不論俸滿即升之

員

如煙瘴苗疆之類

次將不論俸滿升轉之官

如押運議叙之

類

均各照日期先後推升

知縣以上照奉旨日期注册

知縣以

下照文到日期注册

又次升卓異之官以上各官有同日

奉

旨者則準俸深者先行升補若無此等官員仍將俸

深之人升補八月十二月升授俸深之官此內

有不論俸滿即升不論俸滿升轉卓異之官繫

俸深者仍論俸升補即升等處不準隨帶

一即升推升次序順治年間定京外官員推升如遇月分所出之闕均繫應升者悉按京外品級大小照品級考所載俸深者論俸次先後即升卓異者論即升卓異年月先後先盡京官次用外官京外相同者則以品級大小為序如品級又相同者則以品級考所載先後為序挨次坐升

一科道內升外轉乾隆元年奉

旨科道內升外轉者俟得闕後再離原任其未得闕
之先仍食原官之俸照舊辦事○五年奏準內升
外轉官均按品級考注冊在任候補繫內升者
候闕具題外轉者不必投候補之文驗到亦不
必論已未隔五十五日於單月遇闕先補其未
經得闕以前如遇丁憂告假降革事故後經服
滿假滿開復遇有應升即準具題升補單月應
轉員闕亦準即行轉補若一時無應升應轉之

闕仍令其原官補用在任候升○十六年

諭科道近列臺垣優絀尤為易見自可不次擢用而定例內升外轉給事中則一年一次御史則一年兩次每逢奏請時自康熙雍正年間以至今日亦率降旨停止者多每年徒增此題奏繁文於治理亦屬無益嗣後內升外轉著三年舉行一次永為定例欽此

一捐納試俸實授康熙六十一年議準在內郎

中以下小京官以上在外道府以下雜職以上

均令其於見任內試俸三年方準照常升轉試俸

三年實授之後仍接算試俸
年月照常升轉不行扣除其從前捐納各官

已滿三年者停其試俸未滿三年仍以從前到

任日期接算試俸三年見任各官無論已未滿

三年又照例捐升者仍令於升任內試俸三年

均自到任之日扣算俸滿在內各部院堂官在

外各該撫具題到日準其實授雜職教官免其

具題止令咨部注册準其實授

一額外署職實授順治年間定在京大小官員

在部院行走未經坐補正額者挨坐補後方準

算俸升轉

額外之俸不準通算以實授後到任之日起

○雍正十二

年議準

命往試用道府以下州縣以上署職各官銜大闕小

銜闕相當者試用一年銜小闕大者試用二年

果能稱職該督撫將差委効力署印實在政績

序入本內保題實授果繫卓越之才即不滿年限亦準聲明題請○乾隆二年奏準佐雜署職官員亦按其銜闕分別試用一年二年果能稱職將差委署事勞績察覈咨部準其實授附入月分彙題○又定凡署職各官均俟本部覆準實授後再行論俸

署職之俸不準通算以實授後到任之日起

銜闕

相當人員照闕升轉銜大闕小銜小闕大者仍

照各原銜升補

銜小闕大借署照銜升轉專指試用官員若見任官保題升署

升補不
在此例

○十年奉

旨各省要闕有一時不得合例之人該督撫題請越
銜補授及升署者雖與定例未符尚因地方緊要
或一時不得合例之人起見至署理之人辦理事
務與見任無異自應照例俟年限滿日題請實授
今署瓊州府之人試用年限未滿該督遽請實授
繫有心博屬員之感以致違例辦理近來似此者
頗多該督著飭行嗣後有似此者即著該部隨本

一并察議欽此

一無保舉人員升選康熙六年議準生員例監
吏員出身等官經堂官及督撫保舉者方升京
官及正印○又議準由生員例監吏員出身之
郎中員外郎主事無保舉者郎中以運同升補
員外郎以運同府同知升補主事以府同知升
補仍算京俸與應升人員較俸升轉在外官員
由生監吏員出身者無保舉亦不準升京官及

正印官○乾隆四年議準在外官員如有曾經
薦舉卓異一次及督撫指闕保題升用正印官
一次者準其以保舉註冊與應升京官及外正
印官人員一同較俸照常升轉不必復行保舉
至在京官員如曾經京察保舉一等一次及該
堂官指闕保舉升補郎中員外郎一次者亦應
準其以保舉註冊照常升補至京官內如戶部
寶泉局大使禮部會同館大使鑄印局大使兵

部會同館大使刑部司獄五城兵馬司吏目鴻臚寺主簿鳴贊序班理藩院副使順天府照磨司獄大興縣典史宛平縣典史奉天府司獄承德縣典史雖算京俸無保舉人員亦準升除○四年奏準八旗漢軍捐納即用人員

朝考後方準補用

八旗漢軍補用後不論何項出身一同升轉無保舉之例未

經

朝考者赴部之日由部請

旨照考試漢中書之例在

午門內考試詩論恭候

欽點大臣會同本部堂官閱卷擇其漢文通順字畫

端楷者奏

聞交部各按其班次銓選其文理不通不堪錄取者
俟下次考取後再行補用

一升銜留任順治年間定凡加銜出自

特恩無定秩其開列升轉仍照本任升轉○雍正二

年奉

旨擬定官員升往別省經督撫保題以升銜留任者必須實屬緊要其人其地必不可更易方許具題請

旨俟奉

旨準以升銜留任後即照升銜升轉如並非緊要一
槩不許題留○乾隆十六年

諭江蘇巡撫奏稱元和縣知縣籤升貴州永寧州知

州該員操守謹飭才具幹練懇以升銜暫留任遇有江省相當知州員闕酌量題補等語元和省會首邑既屬人地相宜以升銜仍留原任於理尚屬可行但既留任遇相當知州員闕即行題補又須離任仍於該地方未有裨益轉啟規避之端朕思守令久於其任可以勵官方而收實効既準予升銜已合古增秩進階之義嗣後知縣籤升外省督撫奏留本任者俟留任五年後遇有相當之知州

員闕題補如首郡知府升任道員該督撫題留者視此著為例欽此○十八年

諭據蘇撫奏丁憂服滿知縣前經推升貴州永寧州知州原任撫臣奏請以升銜仍留元和縣知縣任今回籍服滿來蘇應坐補原闕但該員籍隸山陰在五百里之內與例未符請令赴部別補等語著仍發往貴州以知州補用向來近省知縣內往往有任遠省而該督撫以人地相宜奏請升銜留任

者雖因地方起見亦易啟規避之漸嗣後各省奏留人員內如遇丁憂事故起復之日皆令仍赴升任省分候補著為令欽此

一推升知縣等官截取雍正十年議準應升知縣之教職以及經歷等官由部按其俸次最深任內無叅罰案件及下第舉人補授教職按其科分名次輪班應選者酌量截取令該督撫詳加驗看擇其年力才具可勝牧民之任者出具

考語給咨該員赴部照例升選與月選官一例
考試引

見補授其有年力就衰辦事平常自揣不勝縣令之
任者該督撫咨部注冊除正印官不準升用外
其應升教職佐貳等官仍照例升用至教職等
官有題定三年或五年俸滿即升者該督撫報
滿部議準其即升後給咨赴部仍照即升月分
升用以上截取人員將次用完再行酌量截取

倘離任後原任內有降罰事故均照離任官例
議處將降罰之案帶於新任其俸次在前應截
取之員見任內有叅罰事件未獲截取續經銷
案即補行截取仍較俸升用○乾隆十七年奏
準俸深應升之教職及經歷等官遇應行截取
時令該督撫驗明人才堪勝民牧之任出具考
語咨部注冊在仕候升俟掣籤得闕後行文該
督撫給咨赴部引

見

一即升卓異丁憂候補康熙三十八年定凡外省官員本任內經督撫保薦即升卓異未經升用丁憂者起復赴補之日仍歸單月不入各項候補班次遇闕即補其卓異仍帶於新任○乾隆七年議準官員曾經卓異即升未經升用緣事降革後本案審虛開復候補亦照丁憂候補之例畫一辦理

一擬升擬選丁憂候補乾隆五年奏準凡各省見任官員推升得闕具題之後應調來引

見如未經引

見奉

旨補授適遇丁憂事故或緣事降革後經服滿開復
竢赴部候補之時仍歸所升班次原繫即升者
歸於即升月分先盡升用原繫俸深者歸於俸
深月分先盡升用即以升班積算其督撫保題

升用人員如已經奉

旨引

見緣事離任者竝赴部候補之時引

見或準其以升闕仍發往該省別行題補或歸於月

分仍以原官候補之處請

旨遵行至佐雜教職例不引

見如經部擬升擬選已經具題奉

旨補授該員適遇丁憂事故未及考試驗看到仕及

各省咨升佐雜等官本部已經議準彙題奉

旨補授該員適遇丁憂事故未及到任者將來服滿開復赴補均歸於應補班內悉照升闕選闕補用其有雖經擬升擬選尚未具題奉

旨及督撫咨升人員尚未彙題奉

旨者仍歸各原班選用○八年奏準凡各省升署未經實授人員遇丁憂事故服滿開復赴部者無論已未到任均照試用人員之例令其赴原任

省分交與該督撫遇闕酌量題署

一京官降補順治年間題準三品以上降至正四品者以小四品京堂補用降至從四品者不補祭酒以正五品京堂借補仍支從四品俸○

乾隆四年奏準從四品內惟祭酒升轉甚優既不準其降補自不便照祭酒升轉應以從四品銜管五品京堂事遇有開列升轉列於各項五品京堂之先專以應升之四品京堂升轉

如通政使

司叅議光祿寺少卿均繫正五品京堂而叅議又繫光祿寺少卿應升之闕其由從四品借補者遇有開列列於通政使司叅議之前專升小四品京堂遇有叅議不行開列借補○又

奏準京堂降至正五品從五品者不補郎中員

外郎各照依對品以堂官員闕補用

如降正五品則以通

政使司叅議光祿寺少卿補用降從五品則以鴻臚寺少卿補用

降至六品以

下者並無堂官可補應停其補用

四品以上京堂品秩優崇

若降至六品以下補用司官與體制不合故停其補用

五品京堂降從五

品者亦不補員外郎以堂官用

降從五品堂官有鴻臚寺少卿

可補故仍不補員外郎如降至六品以下悉照所降之級

與各項降官一例補用

五品京堂降至六品以下均繫司官若一槩不

準降補則降一二級即屬無官可補故仍準與各項降官一例補用其各項降官

均照所降之級序補

悉按品級考所載序補如降從五品以員外郎用降

正六品以主事寺丞京府通判都察院經歷用降從六品以光祿寺署正補用之類惟降

至從五品者不補鴻臚寺少卿

繫堂官不便將司官降補降

至正七品者不補大理寺評事太常寺博士

評事

博士與六品升轉相同故不準補

降從七品者不補中書舍人

中書亦與六品升轉相同故不補用降從九品者不補司務司務品級

雖微升轉甚優故不準補均各照對品別官補用又五品京

堂及翰銓科道謫官如遇大理寺寺丞一闕惟

五品京堂謫官準其補用謫官寺丞應開鴻臚寺少卿由五品京堂

降補未為從優故仍準補其翰銓科道謫官不準降補以對

品別官用翰銓科道謫官若準補用寺丞則一經降補即得以鴻臚寺少卿先行開

列升轉過優故不準補如已降至署正等官遇有寺丞仍準升轉俟升至寺丞後再行開列鴻

臚寺少卿此外各闕均與各衙門降官一例按其品

級較文到日期先後補用補用後亦與各項官員一同較俸凡遇應升槩準升轉至品級考所載京堂翰銓科道謫官寺丞開列升轉及謫官補用後推升之處仍準無升

如寺丞應升員外郎繫謫官又應開

列鴻臚寺少卿署正應升主事繫謫官又應升用寺丞之類均仍準其兼升

一外官降補順治年間定凡在外降級各官皆照所降之級遇相對員闕補授惟布政使降一級不補按察使借補正四品道員仍帶所餘之

級運使降級不補道員通判布政使司經歷理

問運判州同降級不補知縣

佐貳不應降正印無論何項出身均

不準其補用

凡降級官員內有例監生員吏員出身

者

不論有無保舉

不補正印官均以對品別官補用

前段

繫佐貳不降正印此繫無論正印佐貳降級由例監生員吏員出身者繫不準補正印均以別官用若原繫正印官由正途出身如應降正印官仍應準補

一道府不準改用部曹乾隆十四年奉

旨各省督撫於所屬道府內有不能勝任者或奏請

調簡或勒令休致不得仍請以部曹改用此定例也朕思此等人員既以不能勝任經督撫奏請改補內部執例詰駁往返之間轉得遷延時日該員明知不能久留未免志意隳頽視同傳舍甚至縈情囊橐簞簋不飭於地方殊屬無益嗣後各督撫題奏改補人員務於本摺內分晰聲明或宜調簡或勒令休致其才具平常而年未衰老者或以同知降補皆著送部引見有違例仍請改用部曹吏

部一面將該員議處一面行令離任毋致貽誤地方此本內山東巡撫所請改補之登州府知府著送部引見欽此


一試用借補人員升轉降補乾隆二年奏準凡各省試用人員有大銜借補小闕小銜借補大闕者除小銜借補大闕照銜升轉外其大銜借補小闕之員如原銜繫候補候選捐納即用者準其照銜升轉如原銜繫考職捐職惟河工効

力人員準照原銜升轉其各省試用之員均照見闕升轉若各該省有應題升咨升之闕與伊等職銜相當或在原銜以下者仍準該督撫酌量題咨升用至借補各員緣事降調除小銜借補大闕悉照原銜降調外其大銜借補小闕者惟候補候選捐納即用之人準照原銜降調其捐職考職者無論河工効力及各省試用人員皆照見闕降調其原有職銜準其於降補任內

隨帶不準照銜升轉如見闕無級可降即行革任給與原銜休致不準補用

一借闕候補乾隆四年奏準凡各省大銜借補小闕小銜借補大闕人員服滿開復赴部候補由部察明該員原銜如繫候補候選捐納即用例應照銜升轉者準其照原銜補用如繫捐職考職例應照闕升轉者均令其照闕補用至考職捐職人員惟借補河工者方準照銜升轉如

緣事離任後經別補若仍留河工準河臣酌量
補用如並不留工赴部候補亦照各省之例槩
令照闕補用不準仍帶原銜此內有銜小闕大
者即照原銜補用



欽定大清會典則例卷九

欽定四庫全書

史部

欽定大清會典則例卷十一

詳校官檢討臣劉 炳

編修臣程嘉謨覆勘

總校官原任中允臣王燕緒

校對官中書臣呂雲棟

謄錄監生臣鄧以伊

欽定四庫全書

欽定大清會典則例卷十

吏部

文選清吏司

除授

一進士授職第一甲第一名授翰林院修撰第二甲三名授編修二甲三甲進士除簡選庶吉士外餘均以知縣用其以部屬用以知縣即用

以教職用於引

見時恭候

欽定

一庶吉士散館奉

旨留翰林院者二甲授編修三甲授檢討以知縣即用者不論雙單月即用以知縣歸班用者仍歸進士原班候選○乾隆四年奏準庶吉士散館以主事用者令其掣籤先分發六部在額外主

事上行走

選用班次載
雙單月選法

其中如有實心辦事熟

練部務者遇本部主事員闕該堂官保奏引

見補授

一進士分部學習雍正二年引

見新進士奉

旨朕批內用者著用為六部額外主事學習辦事○八

年奉

旨今科進士除選授庶吉士外其點出之五十八人著

於六部額外主事上學習行走三年之後該部堂官題補果有才猷出衆明練政治之人於一年之後該堂官保奏引見

一分部進士學習期滿乾隆元年議準學習進士三年期滿該堂官分別引

見其以主事用者照甲第名次歸於月分選用

班次詳載

雙單月選用

未經補授之先仍令在部辦事如有熟

練部務者遇本部主事員闕亦準該堂官保奏

引

見補授以知縣用者歸進士原班選用如才具平常
奏明咨部以國子監助教監丞司經局正字三
項遇闕挨次具題補授有情願改教者準其呈
明改補

一進士選用知縣雍正元年議準歸班候選知
縣均令回籍挨投供候選進士將次用完具題
截取赴部投供照原甲第名次挨選○乾隆元

年奏準新科進士奉

旨以知縣即用者照奉

旨名次先後歸於雙單月進士班次之後各選用二
人

一進士選用教職康熙四十八年覆準進士候
選知縣有情願就教者無論已未截取具呈到
部以本省府教授按科分甲第名次挨選其有
進士未任知縣奉

旨以教職用者遇本省府教授員闕即行補用

一舉人簡選舊例會試下第後願就選者考授
推官知縣通判等官○康熙九年議準均以知
縣用○三十七年議準簡選舉人除雲貴川廣
福建湖南等省不拘科分外直隸等近省舉人
竣會試三科不第後有情願簡選知縣者準其
簡選○三十九年議準各省簡選舉人照鄉試
名次先後挨序若科分相同則照名次先後若

名次相同則照省分次序逐科分榜注冊揆選
嗣後一科與三科之人均照鄉試名次為序○
雍正元年題準舉人除一科外令直隸各省督
撫於鄉試事竣會同主考官將願就知縣者秉
公驗看彙冊送部其不能作縣及願就教職者
別冊造送○十一年議準截取起文之時督撫
再行驗看其年力可以作縣者給文赴部如年
力衰邁者咨部以教職注冊○乾隆四年奏準

嗣後舉人候選知縣埃截取時各該督撫仍照舊例驗看給咨赴部其下科鄉試時先行驗看之例槩行停止至各省舉人就教應於每科會試發榜後雲貴川廣福建湖南等省會試一科直隸等近省會試三科後願就知縣者在部具呈簡選擇其年力富強者準以知縣注冊其年力就衰者以教職注冊倘有患病丁憂事故未經簡選準其下科補行簡選

一舉人兼掣州同雍正三年議準直隸州州同
歸入知縣班內令舉人兼掣補授籤掣詳月選例仍與
知縣一例升轉

一舉人就教康熙九年議準舉人願就教職者
照考定名次以學正教諭用○二十六年覆準
免其

廷試具呈到部照科分名次補用○乾隆七年議
準舉人一科不第如有情願就教及已經簡選

知縣情願改教取具同鄉京官印結呈部或由
本省督撫具呈咨部注册補用與驗看注册人
員同較科分名次挨選

一漢軍舉人授職順治九年題準漢軍舉人以
筆帖式哈番用○康熙二年覆準以知縣用○
三十九年覆準漢軍舉人照漢人例三科不中
願就知縣者以知縣用各項知縣每選過三班
大選以十七人為一選用一人○乾隆七年奏
班三班共五十一人

準漢軍舉人每科會試榜發後願就知縣者不論科分取具該都統印文具呈到部簡選擇其年力富強者以知縣註冊挨科分名次按班選用如年力就衰者以教職註冊與直隸漢舉人較科分名次挨選

一教職小京官中式留任乾隆三年

諭見任教諭會試得中進士例應歸班者仍令回原任以教授銜管教諭事見任訓導鄉試得中舉人

副榜者仍令回原任以教諭銜管訓導事若該員本班應選時仍照常銓選遇卓異薦舉亦照銜升轉永著為例欽此○四年奏準見任內閣中書中式進士奉

旨以部屬用者以六部主事補用○七年奏準訓導中式舉人又經中式進士例應歸班者亦令留任以教授銜管訓導○又奏準七品以下小京官中式進士除

欽選庶吉士及奉

旨用為部屬或以知縣即用者該衙門即行移會到部開闕其歸班選用者令留原任不必加銜仍接算前俸照見任推升停其以知縣候選○十九年奏準見任中書中式進士奉

旨以部屬用者先令掣籤分派各部額外行走歸於五闕後補用

一副榜恩拔歲貢授職原例各省學臣歲科考

竣會同巡撫將恩拔副榜與歲貢傳齊驗看彙冊送部注冊副榜照科分名次恩貢拔貢歲貢照年分先後繫同年者由部遇闕代為掣籤副榜恩拔均以復設教諭用歲貢以訓導用○康熙二十六年覆準捐納歲貢以復設訓導用○雍正元年

諭直隸各省教職等官乃專教士子之人今準捐納以致文理不通少年反為學問優長年高齒長者之師

可乎伊既捐納應照伊品級別任補用之處交與該部議奏欽此遵

旨議定嗣後各省教職除正途照舊選用外其由生員捐納貢生者教諭改以縣丞用訓導改以主簿用○三年奉

旨捐納教職人員內有由廩生出身者原通文理著照舊以教官用遵

旨議準廩生捐納歲貢照捐納日期先後以復設訓導

用○又議準直隸州州判漢軍令該旗都統漢人令各該督撫將恩拔副榜貢生簡選年力富強者造冊送部遇有員闕掣籤補授調取來京引

見與學正教諭較俸升轉

一貢生肄業期滿雍正八年覆準恩拔副榜歲貢生肄業三年期滿使充教職給發執照回籍候選○乾隆二年覆準在監肄業恩拔副榜貢

生三年期滿如其中果有學問優深人品卓越者令該監秉公薦舉引

見請

旨其餘循謹之士堪任訓迪者咨部以復設教諭選用如本班頂選仍歸原班選用歲貢肄業期滿咨部以復設訓導選用本班頂選者亦仍歸原班選用各省保舉優行生員準作貢生者照歲貢肄業期滿歸於各本年歲貢分內以復設訓

導用

肄業貢生選用教職各照期滿日先後挨選班次詳載月選例如遇考職

之時一同咨送

一貢監考職舊例貢生監生一例以州同州判

縣丞主簿吏目考用○雍正六年議準貢監生

考職照科場式例取具地方官文結

漢軍取具本旗印結

及國子監肄業咨文到部將原捐執照呈驗并

將年貌履歷三代籍貫投具親供京官主事以

上印結及同考五人互結由部奏請

欽點大臣閱卷並滿漢御史二人本部滿漢司官各
二人點名給卷編列字號分坐如有包攬代作
等弊該御史察叅○乾隆元年議準恩拔副榜
歲貢除本人已就教職及直隸州州判仍歸原
班選用毋庸赴部考試其願就佐貳者準其照
例考試恩拔副榜貢生考取一等者候選州同
二等者候選州判三等者候選縣丞歲貢生考
取一等者候選主簿二等者候選吏目入於雙

月一應一捐之後選用二人

均按考案年分名次挨選

均令

在籍候選未經選用之先遇鄉試之年照舊聽其鄉試考取之後有願就教職者仍準以教職用○二年奏準捐納貢監生照歲貢之例以主簿吏目考取貢生考職均不論起貢年分監生捐納未滿三年不準收考○三年奏準貢監考職嗣後於鄉試之年定期五月內考試文結務於三月內到部○七年遵

旨議定漢軍歲貢及捐納貢監生亦照漢人之例準
其以主簿吏目考取有願改降雜職者亦準改
降主簿告降準以吏目用吏目告降從九準以
巡檢等官用告降未入流準以典史等官用其
改降人員不準遞行告降○九年奏準貢監考
職務擇其文理優通者酌量錄取寧少無多文
不入選者不錄○又

諭嗣後除文武鄉會試並考試童生仍在貢院外其

餘各項考試著照從前午門等處朝考舊例辦理
仍於取錄之後再行嚴加覆試欽此

一廕生錄用雍正元年覆準尚書給與一品官
廕生以員外郎用侍郎給與二品官廕生以主
事用總督與尚書同巡撫與侍郎同○七年議
準正一品官廕生以員外郎治中用從一品官
以主事用正二品官以主事都察院經歷京府
通判用從二品官以光祿寺署正大理寺寺副

用寺副乾隆十七年裁正三品官以通政使司經歷太常

寺典簿中行

行人司乾隆十三年裁

評博兼用從三品官

以光祿寺典簿鑾儀衛經歷詹事府主簿京府

經歷用四品官廕監生與捐納貢監考職者一

例考定職銜入於應選班內分闕輪班選用○

乾隆四年奏準漢廕生引

見除奉

旨外用及照例內用者均毋庸分部外其有奉

旨指出以何部員闕補用者即令其赴該部行走
有員闕該堂官題補未補授之前給與單俸○
七年奏準左都御史職掌與尚書同其廕亦同
一漢軍廕生錄用康熙十二年題準一品官廕
生以員外郎用二品官以大理寺寺正乾隆十
七年寺
正改為知州用○雍正七年定廕生例用知州
寺丞
者以主事改補○乾隆五年奏準三品官廕生
以七品筆帖式用四品官以八品筆帖式用

一廕生外用乾隆元年奏準廕生奉

旨以外任用者正一品官以府同知用從一品官以知州用二品官以通判用三品官以知縣用

一廕生考試舊例廕生肄業期滿由國子監咨

送到部照品級題廕年月先後挨選

武職廕生咨詢兵部

品級題廕年月有無事故

其同日具題者照題疏名次先後

錄用○雍正三年定廕生咨送到部將年二十

以上者奏請考試引

見○七年定各項廕生有二三人到部即考試履歷
進

呈引

見○乾隆十一年奏準廕生到部試以古論及時務

策

試題由閱卷大臣擬出

奏請

欽點大臣閱卷定其甲乙恭

呈

御覽其文理優通議論明暢者交部引

見荒謬者發回本籍讀書三年再行考試令考試大

臣於進

呈試卷摺內聲明停其引

見○十二年定廕生到部守候已逾三月尚無續至者即奏請考試引

見

一補廕復廕乾隆四年奏準凡文武官廕生廕監生未經出仕中式而病故及患病殘廢者均

準將

詔前所生子孫咨部覈明具題補廕仍以原廕廕生
題廕年分選授其由廕監生已得官職及科目
中式者不準補廕已補而又病故及殘廢者亦
不準復行補廕再文武官廕生廕監生國子監
咨送到部除已經補用外其注冊未用者如所
廕之官降調少刺微職免其草廕其所廕之官
草職廕生監生亦草去扣選後所廕之官還職

或還職後別經降調及奉

特旨起用不論文武銜闕如品秩相當及在原品以上者均準其將原廕之人咨部具題給還原廕倘原廕之人殘廢病故或於革廕後業經出仕中式準其別將

詔前所生子孫咨部具題補還原廕仍照先廕生年分注冊挨選

一廕生改武雍正三年議準武職廕生內除通

習文理者照例考試以文職補授外其有幼習
武藝人材壯健願改武職者呈報到部移咨兵
部以武職改用○十二年奏準文職尚書等官
並四品廕監生如願改武者均照品級改用
一難廕生錄用康熙三年定三品以上廕知州
四品以下廕知縣○十八年定布按都三司首
領及州縣佐貳六品七品官之子準廕縣丞八
品九品官之子準廕縣主簿未入流之子準廕

州吏目

均照本銜廕
予不照贈銜

一薦舉孝廉方正康熙六十一年十一月

詔每府州縣衛各舉孝廉方正暫賜六品頂帶以備召
用務期採訪真確毋得濫舉○乾隆元年議準欽奉
恩詔保舉孝廉方正令直省督撫轉飭府州縣衛各
官令該地方紳耆庶鄰里鄉黨合辭公舉該
地方正印各官採訪公評詳稽事實其所舉或
繫生員會同該學教官考覈造具事實冊結加

具印甘各結申詳該管上司逐加採訪督撫覈實保題給以六品頂帶榮身如其中果有德行才識兼優堪備召用者準該督撫出具切實考語破格保薦給咨赴部會同九卿翰詹科道公同驗看如果衆論相符引

見候

旨簡用○五年議準嗣後保舉孝廉方正除樸實拘謹無他技能不能考試者照例給與頂帶榮身

毋庸送部外其有德行才識兼優督撫逾格保薦者竣驗看之後試以時務策一道牋奏一篇會同禮部定期具奏於

太和門內考試其試題先期移咨內閣由大學士恭擬進

呈會同禮部監試將試卷進

呈引

見候

旨簡用

一徵召山林隱逸康熙九年

詔地方有才品優長山林隱逸之士該督撫具奏酌與錄用○雍正十二年議準遵奉

恩詔如有山林隱逸之士該督撫具題覆準令其赴部其錄用之處具題請

旨

一薦舉優行生員雍正四年

諭學政奉命課士黜劣舉優是其專責嗣後學政三年
任內將生員中實在人品端方有猷有為有守之士
大省舉四五人小省二人具題送部引見候旨錄用
欽此

一幕賓議叙雍正元年議準各省幕賓凡籍隸
本省者槩不得聘如違交部議處其督撫幕賓
務令選熟練老成深信不疑之人先將姓名履
歷具題造冊報部存案如果効力年久勤慎無

過者該督撫保題議叙原有職銜者按其應得
職銜即行補用無職銜者量給職銜如有才守
出羣者特疏薦引從優議叙○乾隆元年議準
司道以下各官幕賓除緣事斥革及職掌書算
內號瑣事並本官子弟親屬來署幫助者不準
申送議叙外其實在聘來管理刑名錢穀之幕
賓於到任時先將姓名籍貫申報督撫存案自
申報之日計算六年期滿該員任內並無叅罰

事故事果能深信其有為有守才識兼優出具印
結申送督撫詳加驗看考試其文理欠優才具
平庸者即行駁回如果文理優通熟諳吏治才
具確有可用者方準保送將考試原卷一并送
部俟直省彙齊之日由部照考職例請

旨欽點大臣校閱試卷分別等第給以職銜分班選
用原有職銜者酌量予以先用年老不能出仕
者給與頂帶榮身如有文理荒謬不諳律例者

將濫行申送之原保官並具題之督撫分別議處

一吏員授職康熙三年題準吏員考職分為四等一等以正八品經歷用二等以正九品主簿用三等以從九品雜職用四等以未入流雜職

用
考試詳見
驗封司

○雍正五年議準京通各倉倉書

五年役滿倉糧毫無虧空咨送到部免其考職以從九品未入流二項令其兼掣再禮部儒士

食糧三年期滿咨送過部免其考職以府檢校
典史注冊選用並由禮部以鑄印局大使簡選
題補○十三年議準各館供事闕將頂補之人
姓名籍貫著役日期及頂補某人之闕豫先咨
部如各衙門咨送者務令在原衙門著役四年
以上方準送館竝到館後再補闕食公費二年
方準咨部如各館自行召募者令其補闕食公
費之後典籍廳撥送者五年期滿方準咨送考
算補闕食公費

職如不足年分者不準選用○乾隆二年奏準
內閣六部太常寺等衙門事繁書吏五年役滿
該堂司各官察其平素勤謹並無過犯者出具
考語咨送過部將從九品未入流二項令其兼
掣以掣得之闕注冊選用
以上各項班次均詳載月選條○四
年奏準內閣六部並各衙門即用書吏五年役
滿各該衙門務於一月之內即將該吏著役時
地方官印結並取具同鄉京官印結一并咨部

注冊選用

一外省吏攢授職雍正十二年議準直隸等省
吏攢五年役滿令該管衙門取具本吏親供保
結送巡撫於每年七月內考試將試卷封固送
部限於十月內到部與在京各衙門役滿書吏
試卷一并校閱分為四等考定名次品級將執
照封發原省給各該員收執在籍候選

一外郎錄用舊例六年滿日考定州同州判縣

丞職銜照漢人例依次選用。康熙二十九年
題準外郎六年滿後考定職銜歸於貢監分內
將貢監選七人外郎選一人

欽定大清會典則例卷十